

荔隱山房文略

荔隱山房文略

莆田 涂慶瀾

目錄

貴州鄉試錄序

請飭辦莆田械鬥摺

請改移通判縣丞片

請暫停保護法商摺

浙江知府謝恩摺

上某中丞

上龍方伯

上胡方伯

上聶方伯

與某提調書

復楊鎮寧啟

莆陽文輯序

興安課藝序

華園舊墅記

李秋圃七十壽序

林茹珊六十壽序

堂叔有三七十壽序

大宗祠進主祝文

先考妣陰壽祝文

廣東知縣楊君墓志銘

永春州學正許君墓志銘

四兒開棠壙志

女弟銀貞祭文

擬李忠定秋色賦

昆明池習水戰賦

附

閻鶴泉公祝五十壽文

趙仲瑩公祝六十壽文

貴州鄉試錄序

光緒五年貴州省舉行己卯正科鄉試禮部以考官請得

旨命

臣

涂慶瀾偕

臣

秦鍾簡往典厥事伏念

臣

聞海鯨

生學殖謫陋由順天舉人考充

咸安宮漢教習

議叙知縣同治十三年中式進士改翰林院庶吉士光緒二年散館一等授職編修供奉日淺方惕惕然恐瘵厥官茲乃仰荷

溫綸俾持文柄感激

恩榮惟以弗克勝任是懼謹偕臣秦鍾簡駢征就道齋
被入闈扁門三試悉心校閱得士如額擇其文尤
雅者進呈

御覽

臣

例得綴言簡端

臣

聞古者大比賓興考其德行

道藝而勸之今日科舉之文固以藝而蘄進乎道
也古者語於郊者必取賢歛才焉或以德進或以
事舉或以言揚今試士之經義詩策則以言而蘄
勉乎德與事也漢世選舉不廢考試明經皆試家
法故試士之法莫先於經義後人苟安固陋謂古

學爲不可復科舉文字本末不必相符豈知漢之
賈誼袁安唐之韓愈姚崇宋之韓琦富弼學貫天
人功及久遠其初曷嘗不以經義策對詩賦颺名
於丹扆彤庭間乎且使周邵二程俯就科舉之業
其文章古雅渾厚亦必皆約六經之旨而成故學
者非稟經不足以修詞試士者非宗經不足以立
範惟期育賢得才合於古者賓興之意而已黔雖
僻遠然自明以來王守仁鄒元標先後濬廸文教
蔚興至我

朝崇尚經術

聖澤遐敷譽髦俊傑蜚聲騰茂雖兵燹頻仍而士氣不
替況廓清底定以後豈無如賈姚韓富之徒本有
用之學爲有學之文以待衡鑒者之遴取乎臣夙
夜兢業殫竭心力願爲

國家甄拔二三實學以上無負

聖天子委任之意下有以慰遠方人士之望雖才有不
及而不敢不自勉者也

請飭辦莆田械鬥摺

奏爲民俗蠻悍械鬥蔓延旗匪結連蠢動請飭嚴加懲
創並力行保甲以遏亂萌仰祈

聖鑒事竊福建興化府屬莆田縣民俗蠻悍好鬥近年
日甚遇有爭競動輒連結鄉村置鎗礮請教師呼羣挈
隊多至千人少亦數百對敵交鋒至於鬥斃多命而不
悔地方文武積習畏懼不敢查究民見告官不辦遂皆
隱忍不告官卽佯若罔聞必不得已則派差役前往諭
止勉強取具空結粉飾了事不旋踵而鬥如故也聞本

年春間該縣東路笏石以下各巨鄉相鬥致斃數命報官不辦遂致蔓延四處羣相效尤於是北路則有九峰中池至霞坂溝上等村其鬥斃數十命南路則瀨溪頂至華亭埔頭等村其鬥斃數十命惟西路廣業常太二鋪稍見靜謐其最甚者東路笏石以下數十鄉如五虎六獅東汙東蔡朱寨等處現在無日不鬥無鬥不斃尸骸枕藉其見共聞而地方官安坐衙署若罔聞知計自入春以來鬥者數百鄉斃者數十命禍亦烈矣絕未聞有辦一鬥案拿一鎗犯懲一兇徒者現在南路接連仙

邑一帶黑白旗會匪又起聞在瀨溪頂豎旗拜盟嘯聚
千餘人勾引鬥鄉奸民入會羽黨四出搶劫擄掠九里
洋大路各處道途梗塞民情洶洶似此匪類橫行大爲
地方之害若非及早撲滅誠恐伏莽日久滋蔓愈多關
係大局非淺應請

旨飭下該督撫臣遴派妥幹員弁酌帶兵勇馳往圍捕
著名旗匪盡法惩治并將械鬥各巨鄉起出鎗礮及教
習兇首各要犯按名悉獲究辦並令收繳私藏器械嚴
行稽查保甲責成地方文武各官遇有鬥案立即親往

彈壓拿辦稟報不准以取具空結私和了事如有粉飾
諱匿立予叅處庶官并不敢玩視民命而免徒知所做
畏矣臣籍隸是邦見聞較確爲綏靖地方起見謹應
詔具摺上陳伏乞

聖鑒謹奏

請改移通判縣丞片

再近閩邸抄聞督撫臣奏請將莆田縣選缺改調摺內
有該縣幅員之廣甲於通省等語伏查莆田縣近海各
鄉民俗强悍自芴石以下至平海湄州忠門莆禧各處
延袤近百里地廣民頑最喜械鬥雖平海設有縣丞然
汎兵差役不過數十人不足以資鎮壓且地濱於南控
馭勢難周徧距郡寫達而莆邑政務殷煩又有鞭長莫
及之勢臣查興糧通判與府縣同駐郡城職務較簡可
否請

旨飭下該督撫會商妥議將興化糧捕通判改爲海防
通判移駐平海并就近於瀕州各營水師酌調一營其
相鎮守卽將平海縣丞移駐笏石首尾控制聯絡聲勢
以成犄角不特海口不患空虛卽笏石附近數百鄉亦
可藉資彈壓一轉移間實於地方治理大有裨益謹附
片具陳伏乞

聖鑒

請暫停保護法國通商摺

奏爲保護法商宜有限制擬請暫停恭摺仰祈

聖鑒事竊法人啟衅以來前奉

諭旨法商照舊保護我

朝如天之仁原冀其悔而就範也乃數月而後猖獗愈甚要求愈貪當事諸臣曾未規畫全局夫各國之利於言和者爲通商耳若一面決戰一面通商則外洋與我遂有不必求和之勢故法商不停不獨敗不可恃卽我百戰百勝法人歛兵歸國不言戰亦不言和彼但歲歲

爲入寇之謀我遂處處無撤防之曰相持既久於彼之
商務略無所損而我之餉力固已不支從來勞師襲達
者利在速戰今轉我惡而彼暇者職是故耳現在法人
旣據基隆又欲封我海口怙惡欺陵晉天同憤應請
明降諭旨將法人不知悛悔不能一体保護情形再行
宣布中外所有各省通商口岸法國坐商及往來法國
商船勒令限期一概與之絕市一面飭南洋大臣將法
使巴德諾卽行驅逐不得任令留滬潛通消息並飭總
理各國事務大臣照會俄使不得藉口保護此議果行

則法之商人度必以罷戰爲急蓋外國之餉取之於商戰未得利商人先受其害孰肯棄有著之利供無窮之餉耶且各口停商之後即使基隆煤礦萬一不守而煤礦得利之商未必卽各口停利之商我但堅持彼必內關此理勢之必然者故不停商務我雖勝而害無窮能停商務我雖敗而勢可脅利害之間相去霄壤或謂法商在中國者甚少恐非所重不知法有租界碼頭坐商雖少而輪船運載之利甚多現此次所議條約一則欲購其船械再則欲辦鐵路工程未嘗不以商務爲轉旋

是其明證且我以畏法要劫押招商局於美國是彼能
阻我之商而我尚欲護彼之市有是理哉夫迫而言戰
原 朝廷不得已之苦心不顧國體而一意求和其罪
固不容誅但知重戰而不思制敵之策則雖一日倖勝
終無跨海聲討之日是無論爲戰爲和權皆自彼操之
將以何策爲收束地哉是閉關絕市之謀此時萬不可
緩矣臣愚昧之見是否有當謹具摺應 詔上陳伏乞
聖鑒謹奏

特用浙江知府謝 恩摺

奏爲恭謝

天恩仰祈

聖鑒事本月十八日吏部以臣帶領引

見奉

旨以知府發往浙江補用竊臣八閩下士一介庸愚學

步花輒濫廁清華之選分持簞節謬膺衡鑒之榮

始典試夫黔中復分校於京兆涓埃未報兢惕方

深茲乃渥荷

溫綸准予外用自

天聞

命賴地增慚伏念知府爲表率之官浙江亦重要之地

如臣禱昧懼弗克勝惟有籲求

宸訓敬謹遵循俾到省後於一切差委事宜矢慎矢勤

以期仰答

高厚鴻慈於萬一所有微臣感激下忱謹繕摺叩謝

天恩伏乞

皇上聖鑒謹奏

上臬中丞

竊某於本正月十二日本 憲札委赴浙西查閱杭嘉
湖三處礮船水師遵卽單舸馳往各該屬召集內河船
隻點查勇丁額數閱拏營哨技藝並諭令各將弁認真
拏練巡防業於月杪回省稟覆各情形復蒙委辦江干
稅務弁保甲局伏念某菲才弱植到省日淺乃蒙 憲
恩稠疊委以重差深懼不克勝任遵於二月十一日到
局接辦所有延用司巡均經慎加選擇嚴督認真照章
持平辦理惟查江干卽錢塘江下通鹽子門硤石海昌

上達富陽嚴州浙東一帶江面遼闊行商衆多自創收浙西起捐舊章向有挂號銷號原因風潮太猛貨船到而運客未到不便久停船隻致有冒險先由過塘行代其報記貨數名曰挂號將貨起入棧後須俟客到銷售來局寫票名曰銷號始繳起捐錢文其中踴躍報捐者固屬甚多而私行越卡偷漏者亦復不少海頭船戶尤屬藐玩異常每當風雨縱橫晝夜昏黑之中裝載滿船貨物揚颿闖越而去於捐數大有干碍某接辦以來嚴諭司巡臨時密查諸事力求整頓兼示體恤不准稍涉

撻切貽累商民亦不許懈怠稽查致有繞越現值軍需
緊急之際比額又歷年加增爲數浩大責任極重自當
隨時隨地逐一稽察剔除弊端務期涓滴歸公捐數起
色以冀仰副裕課恤商之至意除接辦日期具報總局
外合將江干一切情形據實陳明伏乞垂鑒

上龍方伯

竊某辦理江干稅務以比額盈繳一成零蒙札飭留辦
一年並記大功三次正當力求整頓以圖報稱以慰
憲台裕課之至意惟查夏秋之間向值百貨清淡而自
七月以來收數更覺寥寥揆厥來由訪諸輿論僉稱暫
以厘捐酌議新章上江貨物多形阻塞外省各貨近於
長江者均由江面內河輪船繞道而去雖可徐望轉機
而目前遽形短絀極深悚惶至於茶捐比較數千兩往
年正值大旺之時近因上洋價值大賤各商折本甚多

以致茶商裹足不前大半停收不敢置辦大宗茶葉今
歲所收留不過三分之一但望上洋茶價暢銷或可以
盈補絀倘久跌不起茶比之短亦在意中惟有隨時體
察不敢始勤終惰稍涉因循仍當嚴督司巡愈加奮勉
決非飾詞推諉爲將來卸過之地專此肅稟仍候
示遵行

核

上胡方伯

竊某奉到 憲台札開據某茶商呈稱茶捐收洋收錢
請照章劃一完取飭卽查復等因伏查江干自開辦至
今垂二十年經收茶捐向章收足色庫銀因恐銀色高
低不同平戥大小不等而司巡轉得高下其手故酌定
抽收錢文以杜流弊舊例於解捐時由局向錢庄換銀
照市核算加以傾工火耗通盤合計漲落適中既可體
恤商民亦不致有虧公欸固已煞費苦心歷辦二十餘
年各商均無異議某自接辦以來凡有可紓商困者無

不極力爲之卽如本屆茶商報捐現在收數已將過半
尚情踴躍毫無觀望不前已可概見獨該商某覬覦近
來市價偶爾稍短遂執一時之情形意圖再行減折並
非詢謀僉同況江干茶捐每年所收正項不過二三千
兩合通省計十不及一訪之他處亦復以錢易銀其數
相仿足見商情允洽從無異言某辦理一切均按照舊
章無不體恤商艱豈有弊竇力爲剔除昨親赴浮山留
下兩茶卡察訪斷不致司巡節外生枝藉端刁難於商
情有不便之處緣奉前因謹據實陳明伏乞 憲鑒

上聶方伯

竊某接奉 憲臺札飭嚴州以下認捐之欸仍令江干
稽查仰見慎重餉需秉公籌餉下懷欽佩本不敢再置
一詞惟思抽釐定規向係貨不離票按卡稽查如有貨
票不符卽係偷漏浙省釐捐均係照此章程如湖墅之
綢捐安昌之棉花捐蕭山之烟葉捐皆歸各局卡辦理
也今奉 鈞諭責成某實力稽查而該商董所稟不由
某局盖用關防轉給則雖有稽查之責實無稽查之權
試思該商董稟稱認捐之欸儘收儘解無論其如何急

公斷無墊賠先繳之理況認捐又係集股設立公所顯
爲壟斷漁利起見即使強與稽查該商董必藉口需索
其貨票是否相符既無票根可查而票內之貨有無嚴
州以上夾帶之件某亦何從辨白且捐款既經逕解總
局某豈不敢稍爭利權但無票可查設使串通商人隱
射過卡則上江遠路之貨弊混百出勢所必至將來捐
欸奇絀某之功過無足重輕而公家應捐之欸日見消
耗終無可以挽回之策籌措再四惟有瀝情再請 核
示遵行

與某提調書

十五日上院在官廳執事謂僕不必見中丞許以依照
同寮公議函飭某倅將船改停西興乃次日反多船隻
布滿江面直闖至局門前停泊致令捐數驟短商人裹
足不前盡往海昌硤石而去查此項烟葉來自西興若
專爲查貨起見自應在西興口岸停船以扼其要此理
甚明不待智者而知也若云東岸不能停泊試問同是
一江何獨宜於西不宜於東豈江東有潮江西無潮耶
乃該倅舍其要而務其散不鮮是何居心僕屢次造陳

總期於公事無碍絕少成見而執事陰爲主持竟作友
吾之語蓋以該倅辦理聞堰已滿三年局章向不再留
通國皆知而執事與其同鄉至契獨爲保留是可忍孰
不可忍遑恤公言而畏清議此十二日該船渡江闖卡
之辰正執事尊檣下頒之日械中又及周根堂一事足
見此事固結胸中未嘗須臾忘也但執事前荐多人現
均在局執事胡爲忘之耶僕老矣昨遊靈隱有玉堂不
住况黃堂之句行將拂衣歸里臨去不能默默惟執事
諒之

復楊鎮軍啟

廿載睽違蘭芷懷沅江之彥三山再到梅花來驛使之
書喜旣溢於開緘情更深夫覲面臨風一誦舊雨如逢
遙惟麾下韜略風生起居日勝江淮草木知萬福之威
名壁壘旌旗遇臨淮而變色昔日回翔珂里暫憇林泉
此時返旆榕城重開戎閫漁溪隊裏欣近水之樓臺壺
嶠峰頭接軍麾之丰采鈴轅不遠隣壤皆春僕梓里養
痾蒞鄉守拙厭直承明之館十載京華遂陳乞郡之書
一麾浙水錢塘江上曾領略夫湖山陶令歸來只怡情

於松菊杜門謝客書札不到公卿老病賤軀故人忽來
問訊猶記臺江風雨話別愁人不圖舊部旌旄使君還
我飛將軍老當益壯祝黃花晚節之香愧鄙人隱矣無
交動白首如新之慕此日駐軍孔道遙瞻小隊元戎他
時過訪營門更話清溪明月

莆陽文輯序

莆古稱海濱鄒魯壺華靈淑代產魁彥佳章鴻筆照耀寰宇重以薈萃遂垂久遠然自前明鄭山齋莆陽文獻柯希齋莆陽續編後迄數百年乏有繼者莆文幾於散佚盡矣憶余弱冠時從父執宋栢畊先生遊論及詩古文辭先生有彙輯里中遺文之議歲庚申自壽甯貽書勸勉時方務舉子業席帽奔走弗遑也洎甲戌通籍後承乏詞垣纂修國史兼撰進奉文間於史館獲覩鄉先輩文字輒錄置篋中柯亭士柏幸慰仰止而積帙未

能多也客歲歸自杭州從劉淡齋處借閱抄本又蒐訪
諸家遺集采而益之或以人存文或因文存人共得一
百八十一首仿桐城姚惜抱古文詞類纂例分爲八類
句讀加圈閱附注作者官階事略每當空山獨夜青燈
熒然案頭一編雜誦數過不啻與唐宋元明本朝諸鉅
公晤對斗室中親承其聲歎言論縱橫上下樂而忘倦
不自知手之舞足之蹈而老之將至也嗟乎世變方來
那說歛作厭雞愛鶩風向日異視遺獻若弁髦蕩文章
之正軌方馳驚於怪奇譎詭誕幻不經以相爲炫耀安

有誦及鄉先正之遺文網羅散失於千數百年以後者
哉或曰古文夥頤二十行省無慮數十百家子何獨輯
莆爲余曰僕莆人也在莆言莆瓣香前輩是編之輯未
知於山齋希齋兩前編何如然而搜殘訂缺蒼萃於夙
昔莆文不至夫散佚盡者半賴淡齋之力余因是得以
卒業而藉答柘畊先生之遺意云爾爰召剞劂而付之
鋟述其略於簡端己亥秋月

興安課藝序

書院課文之刻由來尚矣余少時見江南正誼院課刻
本卽有策論經義表疏諸作皆嘉道年間殿撰吳晴舫
師馮林一大前輩及吳中諸老爲秀才時所作時八股
文盛行嗜古者或肄業及之猶未暇專心致力於斯也
自辛丑歲奉

詔改爲論策經義由歲科試及春秋闈皆以此取士於
是海內博通之士研精覃思貫穿經史且涉獵於東亞
西歐政事地輿兵法各科學羣然致力而專攻之一洗

數百年空疏舊習不特各直省所出閭藝琳瑯滿目美
不勝收卽書院中課文亦皆矜奇鬥異燦然可觀吁盛
矣余戊戌夏歸自武林當道延主是席六年於茲自愧
老而廢學於斯道本未精屢辭弗獲今杜門養疴百念
皆灰惟時讀諸生鴻篇佳製回環循誦不忍釋手恍惚
少日讀江南正誼院課時也郡守寶君博學好古雅意
造士今捧檄量移建州喁擇其尤者將携至省垣排印
爰檢得積年所錄經義論策並雜作共得若干首曰興
安課藝雖諸生文之佳者不止在是然卽是以觀已可

見都人士學業猛進日新月異豈不足慰寶君愛士之
雅懷也哉今者學堂林立書院將廢士皆習西學新學
是編雖出宜其覆瓿然寶君美意不可負也因鉅爲序
以貽之時乙巳正月

華園舊墅記

余自幼隨先人入城卽居園之東隅垂三十年環堵蕭然一椽聊寄泊庾辰歲始得購遺址而葺之披榛莽闢荒蕪忽土中出一石鐫華園二字旁注康某知爲礪峰尚書舊墅也其西有荔樹余因樹爲寶書閣庋舊書數架閣下一井井旁植花疏密交蔭迤南一室置圖史誦讀其中外爲可自怡樓登樓則壺公鳳凰天馬石室諸山與蓮峰石皆拱列几席東則鳳山塔尖與樹陰隱現樓之前竒石峭立有木樨芙蓉諸樹相間錯點綴未半

而余將出山矣丁亥再歸里乃於中間舊三楹葺爲廳
事頗宏廠階下鑿一池累太湖石甃之池上圍石爲臺
旁種紫薇梅桂數本花時客至則携尊而賞持頤而笑
爲之駢然移日循廊以南有挹壺山館綠陰靜晝齋皆
延師課讀之處迤西則建家廟奉安先人栗主以時修
祀焉庭內外栽綠竹瀟灑可人祠之陰爲荔丹榕翠軒
前置石牀一環以飛來峰小有天二石皆丈餘石徑陡
仄雲根羅列偃者側者立者相望於奇花異卉間上石
磴爲望山聽雨亭手營經年而余又將出山矣迨戊戌

武林回則見榕樹大將合抱因作榕蔭堂於園之北焉
休息所由堂西轉曰半舸亭離地三尺許繚以欄檻若
船窓然四圍嵌玻璃間紅綠林木掩映六時皆陰亭後
種芭蕉滴雨聲與鳴禽上下夏月荔子熟時則解衣坐
石上擘輕紅吟詩歌四體迢適翛然絕俗忽不知吾身
之爲小天地之爲大也蓋至是而園之勝始具余亦將
終老是間不復作出山想矣是不可以不記

李秋圃七十壽序

歲壬午冬李孝廉賓門以覺羅教習來京師供差寓余
邸舍晨夕晤談常時述其尊甫秋圃君高誼懿行心甚
佩之泊丙戌冬賓門期滿引

見後歸閩中適余亦里居遇秋圃於涵江見其精神矍
鑠健飯豪談無龍鍾態爲里中所希今夏還

朝賓門郵書於余曰家君年七十請子一言爲序可乎
余惟禮重引年詩稱介壽本吾儒好德之心效古人頌
禱之義亦君子所不廢也君幼而岐嶷稍長克自樹立

喜涉蠟書籍於虞初齊諸諸志尤癖嗜終日手一編注
目凝想至夜分不輟早歲棄舉子業絕意仕進輒樂逍
遙肆志於山水間所居洋尾村與白塘湖邇每當秋景
澄霽月色瑩澈約二三同志携樽泛櫓於白塘湖中上
下天光一碧萬頃酒酣耳熱便縱談古今風雅遺事及
裨官野史百家雜說聲琅琅震篷背同輩無不奇之咸
豐初年遷居城中時赭寇將至適母氏體違和君遣眷
出城身侍湯藥不離左右在園城中月餘處之泰然天
性至孝尤人所難生平喜交士類見里中有豪俊能文

章者隆禮重幣延致之家訓迨子弟雖十餘年弗敢怠
常愛陸放翁詩以偶聞佳士輒心許老見異書猶眼明
二句乞名人書榜於齋頭尤喜蓄漢唐古今金石字畫
骨董鑒別頗精搜羅什襲其逸興雅致有足多者人第
知君之嗣續繁衍箕裘濟美而不知其解推酬應則羣
賢傾蓋遐軫盍簪宜其頤養而嬉林泉介壽而逢舉案
者歟賓門廣文綺年食餽黌宮之內軾轍齊名登丙子
賢書考充教習今且秉鐸南州祿能逮養可謂榮已文
孫澄濤茂才蜚聲繼起諸孫曾亦一時蘭玉濟濟於庭

今者萊衣舞綵點額含飴行見德門之興之未有艾也
余不能文重以賓門請弗獲辭謹寄數言以侑一觴

林茹珊六十壽序

皇上御極之十有五年歲次己丑五月

大婚禮成曾天同慶二月

歸政後崇上

慈禧皇太后徽號薄海內外歡欣鼓舞江左滬上一隅
爲南北衝華洋巨商大賈雲集鱗萃各輪船洋商均升
旗幟以表賀忱蓋自中西互市以來商務蔚興所謂天
下之商皆悅願藏於其市者莫申江若矣吾鄉人操陶
猗術遊斯地者無慮十數家獨茹珊林君天性伉儷有

雋才善談譚無市儈氣傑出諸鄉人上未弱冠來吳中
習計然業咸同間由京江而蕪湖而江北而滬濱奔走
長江上下數千里每履一處建一業出人頭地聲譽日
起同輩咸傾服之性不靳吝慕交豪俊喜從當世賢士
大夫遊締納徧宇內疏財仗義好施與凡海上及里中
諸善舉莫不傾囊以助值皖豫告災以賑捐例獎得五
品銜翎加級請封贈嗣君五人咸來侍遊並克紹是業
不墜家聲嗚乎士之懷鉛握槧携兔園冊子者每薄陶
朱精頗計然之倫鄙夷不屑道即閒有從事及者則終

日持籌握算爲壘斷計慳囊不破蓬首赤腳身糴備保
中逌逌半生祇自苦耳未知樂趣幾見有優游閑閒身
名俱泰掇是業而不爲業所累如斯人者耶余與茹珊
交十餘年矣今春寓滬上數月時時來寓中風雨連牀
一燈話舊值君六十初度之辰同鄉諸公謀稱觴以祝
聞序於余余觀海上通商大都會梯航輻輳擊轂摩肩
中外一家華夷雜處心羨其履斯地搃斯業身際夫商
務之興互市之盛而有海屋添籌之舉也故樂而爲之
序

堂叔有三七十壽序

吾鄉雞髻山拔出天壺觀音文筆諸峯上山常蓄雲氣
多壽水則發源九鯉湖有仙人蹤瀟洞入於溪生是間
者類皆松喬遺耆隱逸者流蓋吾宗之所居也吾年八
歲隨先人遷城中及長宦遊京師使黔南走燕豫楚皖
吳越數千里輕去其鄉未嘗一日居今年六十有五矣
歸自杭州老且病尚未一履生長釣遊地而族中伯叔
諸昆季則時時來視余有堂第慶瀾揖余言曰吾父今
年正月七旬雙壽願乞玉堂史筆作序爲宗人光余惟

壽文非古也然勸脩稱觴禮所不廢況以叔之居鄉行
善克昌厥後垂光里閭爲余所心折者而可以無言乎
哉叔與余同出高祖儀庭公曾伯祖粹嚴公甫文生員
生六子次學翰公繼遊文庠季爲壽山公卽叔之父亦
生六子叔居長叔祖兩世文學與先大父燕山公先考
偉堂公同蜚聲於時有文名而壽山公有志未成叔先
意承志每以祖武莫繼爲憾則惘惘如也叔母第五天
性友愛每共患難甘苦不得已析業則讓美於弟弗較
錙銖貪肥潤俾諸季得從容以紓而叔則懇懇如也叔

有子四慶濤國學生慶澄俗生餘皆業農諸孫曾亦疑
疑繼起繞膝含飴叔則訓以義方延師課讀每集膝下
詔之曰昔人言世間兩件事惟耕田讀書吾願汝曹安
業勉爲善勿局促作輒下駒則諄諄如也嗟乎世風日
下民習澆漓去順效逆作雞鶩爭者視叔亦可以少愧
矣況平叔性好施與周人急里中有故則排難解紛自
壯至老無虛日創建大宗祠購樑柱督工匠捐金倡始
必以身先叔母鄭孺人頗賢順撝井臼處妯娌無詬諍
聲宜其著齊鴻案家室雍和余歸里後閉門却掃不與

物接而獨喜談叔行事蓋不多叔之壽考惟祿而多叔
之友于克讓也且多叔諸嗣之皆能悅親無違有以綿
福祉於方來也是爲序

大宗祠進主祝文

伏以水源木本家祠隆追始之文春禘秋嘗祭廟重展
親之典聚祖宗於一室永遠不祧合高曾於同堂本支
長衍廟宮既建俎豆宜陳惟我

始祖前明通議大夫鳳陽府知府翠峯公系出漳南官
駁江北黃堂懋績早賦遂初莒水移家遂開望族倚山
光于雞髻偕隱林泉揖文筆於天壺大興科第再傳而
名紹膠庠八世而身膺封誥采芹食餼四代有十三人
同井合居一族出數百湫明經貢士棣萼同榮甲榜乙

科橋梓相繼溯所生皆由祖德追自出宜建宗祠爰鳩
子姓相厥陰陽立基於裴家之原告成於嘉平之月擇
吉而奉安栗主侑神則疊奏梨歌豕一羊一告潔牲牲
亞獻三獻修明典禮拜左昭與右穆敬其所尊合兒孫
與元曾序惟不紊於藏衍雲仍於一十二代南昌之族
大興鞏基址於千億萬年東土之祠永固尚享

先考妣陰壽祝文

伏以父天母地生成懷怙恃之恩春露秋霜吧咭切瞻
依之感緬九旬之壽誕冥漠難通懷二老之年華孝思
靡旣敬援俗例式薦几筵惟我

顯考奉政公府君幼承庭訓長饒黌庠起家孝廉薦舉
應南宮之試歷官學博文章播東海而遙啓迪俊髦教
周諸縣優游杖履壽逾古稀我

顯妣太夫人鴻案相莊鹿車佐政義方有訓畫荻垂箴
慈惠爲懷孫枝繞砌凡仰椿萱之庇蔭宜讀蓼莪而增

哀溯廿年之風木莫觀音容逢九十之悅弧彌殷頌禱
猶憶杭州設奠曾誦禪經矧當梓里遐思特延羽士經
宣北斗冥福有資筵建東軒心香上達剪綵爲屋象幘
餘齋舍之場刻楮猶生仿厯任廣文之署裳衣陳設老
兒戲綵而來醴酒告虔諸孫奉觴以進合元曾爲四代
齊拜舞於一庭念事亡如事存望來歆而來格於戲此
日雙幃祝嘏追祭何如逮養之歡他年百歲稱觥泉路
更肅馨香之典尚享

廣東試用知縣楊君慕誌銘

君諱中楷號柳堂世居西關外楓葉塘曾祖祖某世有
令德父捷興始遷城之坊巷官羅源守備生兩子長德
春武生把總君其次也生而穎慧未弱冠遊邑庠善屬
文下筆數千言立就遇公牘文字及申韓雜家學尤精
熟冠其儕帖括常不屑措意己卯登賢書庚辰考充膳
錄議叙知縣在都日愛交遊與三山陳雪岩太史吳敦
溪昆仲尤爲莫逆每約遊陶然亭松筠菴談聚竟日論
天下事拍案擊節旁若無人見者無不笑其狂甲申法

人犯馬江下游戢嚴郡守檄君辦團練保甲君饒智略
任勞怨遇事不避雖人言嘖嘖而絕不引嫌以此常取
戾於世法事平獎得五品銜甲午將分發出山以丁母
憂未果君居鄉久喜惡公倡修文廟書院及岳公橋觀
音亭無日不以甯事自任蓋君之志嚮在於是而君之
得毀譽亦在於是矣戊戌以來世變日急吾鄉東關外
笏石以下土匪漸起銃刀會猖獗當道邀往設法構線
檢其渠魁民情以謐辛丑春邑議創設內河輪船君往
省稟各大吏購船築碼頭未就竟以積勞染疾遽沒於

臺江客次夫命之修短有數吾不以爲惜獨惜其倡建
絕大善舉之志之不克成就爲可悲也君生於某年月
日卒於某年月日年五十有二子和斡以優貢廷試得訓
導今將往省扶櫬歸葬於天馬山之麓坐向某和斡親
來乞銘銘曰

壺華靈淑鍾毓魁奇乙科發迹百里飄馳有煩劇才困
於鄉圻果敢任事遂叢羣疑利衆濟物未竟設施後昆
繼起有名於時西關之岡佳城嶽寄九原可作視此豐
碑

永春州學正許君墓誌銘

君諱藜光字照樓唐貞元進士衡州刺史稷之後也世祖某由桃源遷居莆之秀郊村祖恭提妣李氏年及笄來歸婚七日而寡矢志撫孤事翁姑以孝聞守節五十七年親見二孫遊庠彭學使以孝慈貞壽匾獎之光緒六年禮部題旌表節孝建坊入祠何制軍編入旌淑錄異數也父寬太事母孝通經史與妣陳氏八袞齋耆生子二君其次也長兄龍光號劍泉試屢高等食廩餼選貢生試用訓導君生而聰穎幼侍父兄讀攻苦不輟進

邑庠與兄齊名同時東關外諸生如唐韻蘇如玉輩皆
與之遊余始獲識劍泉及君王戊戌登賢書余中北榜焉
同年復得與君交辛未入都君挑二等用教職與余時
相過從余方充內廷教習而君與里中李仲懷林少文
皆挑入選將歸里候叙過余別戀戀不忍去自時厥後
蹤迹亦稍疎矣甲戌冬余請假南歸適劍泉有株連之
獄貽余書余爲白當道出之君厯署歸化福甯惠安各
學所至有聲掌教明溪書院從學者衆有振鐸清聲之
頌邇晚年升永春州學正此地爲君桃源故居族人知

書者少君秉鐸十餘年兼訓同宗士皆向學拔科名者
濟濟矣性狷介不隨俗俯仰暇則以詩酒自娛勤於課
士士論歸之醜李氏平東升邑廩生選貢訓導孫某某
皆能世其家學君生於某年月日卒於某年月日壽七
十有四今年眷屬由桃源官署扶柩回里卜葬於某山
坐向某以書來乞銘銘曰

山川磅礴篤生機雲仕而司鐸膠庠有聞名又兼壽世
官廣文靈輜軿返兆此佳墳貞珉可勒永闕幽芬

棠兒壩志

嗚乎吾棠兒而竟止於是耶何天奪吾棠兒之速也憶
丁丑六月荷花生日兒生於京邸適何子義前輩來推
其星命曰此貴品雲程未可量也幼穎異喜書史余爲
延通家趙元香水部閭鶴泉太史課之讀終日伏案攻
苦履未嘗及戶外十數年侍宦都門頗知自奮每同館
諸君會課余齋談諧閑作棠兒則從旁窺聽輒能記其
語於客散後侍余而加質証也甲午秋遣歸里應童試
王季樵學使取入邑庠凡遇歲科試皆一等食廩餼舉

優行咨部壬寅癸卯應鄉闈薦卷性沈靜寡言笑厭交
遊而恂恂恭謹與人無忤容余析諸子產棠兒未嘗有
違言媳許氏同里比部濟川君女賢而慧知書先一年
病歿兒篤於伉儷不忍續絃世咸以孝義推之體素弱
今秋病痢爲醫者誤一旬竟不起易簣時猶能拜余而
逝嗚乎痛哉兒名開棠字叔芾號幼海邑優廩生子女
某某生於光緒丁丑年六月廿四日午時卒於甲辰七
月十九日子時得年二十有八十一月二十日與許媳
合葬於萬松山之陽坐坤向艮兼申寅拭淚爲之銘曰

天之生才兮胡既生而遽召回兮豈重以西河之哀兮
松之麓瀨之隈兮惟佳兒與佳婦妥此土而蔭後來兮

祭女弟銀貞文

嗚乎吾妹秉性賢明少與余處日侍二親幼儀素習女
誠尤精及歸賴氏端謹交稱事姑能孝相夫以誠不幸
孀寡苦節矢貞姑嫜其守撫孤長成持家彌謹里有賢
聲猶憶客裏歸甯返城連宵共話白髮弟兄未幾別去
老淚盈盈今成永訣遽赴幽冥余聞噩耗瞿然而驚念
汝素健胡先余行余亦老矣百不心經前歲哭子慟而
撫膺未及一載又哭汝身衰齡邁此何以爲生今儲薄
品祭汝之靈告潔牲醴告充粢盛汝其有知鑒予微忱

鵬平哀哉尚享

擬李忠定秋色賦

昔黃門寫興廬陵詠聲皆賦景物未盡形容無與修士
之搆焉余念秋之爲義君子是貫援毫賦之以秋色名
篇其辭曰

天宇新霽關河欲霜煙疏露白草捲沙黃秋光淡淡秋
色蒼蒼於是發幽興出洞房下梧桐之庭院步菡萏之
池塘慨天地之合鑠覽山川之送涼爾其冰輪皎潔桂
魄晶瑩是爲月色千里秋清丹楓岸冷黃葉村曠是爲
樹色秋來亦聲遙巒雨洗列岫雲橫是爲山色天外秋

迎蓼洲漲膩蓮渚波平是爲水色秋痕暗生其色之宜
曉也珠滴露兮沾衣鍾應霜兮動杵其色之宜夜也螢
飛火於羅幃蛩和聲於機杼其色之宜陰而宜晴也天
垂幕而烟流風撼林而鈴語螭繞籬而抱花鴉歸樹而
覓侶荒天氣之已涼倏向闕夫溽暑昔之日道騰輪雲
容擁岱波綠籠烟山蒼潑黛炎流金而不風火鑠石其
欲碎曾日月之幾何忽風雲之變態木葉下兮洞庭笳
聲起兮邊塞豈寒暑之推移亦成功之將退伊秋氣之
淒清兮實涼颼之披拂況秋意之蕭條兮復秋容之髮

翳帷茲一色蒼茫烟霏雲縹緲凜冽之三秋紛牢籠不
萬物且夫秋之爲色也嚴凝難犯慄若戰士銜枚無譁
義氣不撓肅若高士節概可嘉或秋霜皎皎如大臣正
色率屬而無邪或秋陽烈烈如忠臣厲色赴難而忘家
洵天地之定理曾何憾於歲華奚必悄焉疚心怛然相
視驚秋景之沈寥訴秋懷兮無已鶴警露於中宵雁唳
空而迤邐悲秋思之撩人怨秋風兮四起則知理有盈
而必縮物過盛而必收繫四時之消息總一氣之遷流
矧至人之勵志景賢哲於前修識草勁於風疾慕桂馨

於山幽固知登眺夫景色原無取乎感秋

昆明池習水戰賦

漢武帝元狩之三年開疆異域拓土中原威宣赤縣氣
懾烏孫於時度夜郎而梗道倣滇水以通源關萬頃之
池塘浪兼天湧造千艘之戰艦陣結雲屯將士如飛遂
耀軍容於邊徼君王好武早平夷患於後昆夫以昆明
國之有池也窟藏蛟鱷穴聚鯢鯨洪濤電駛巨浸天驚
瘴雨蠻烟之界山猺峒獠之兵當漢使過都之會彼越
人恃險以爭抗我天威虎負嵎而盤踞憑其地利蝸據
角以縱橫欲教大夏康居萬里之庾郵盡達除是伏波

橫海三軍之甲令分明於是覽地勢度土宜拓上林之
舊址連灞岸之長陂五丁力劈百道工施桃花源濬竹
筧泉移魚銜珠而隱現鯨鏤石兮迷離豈吳鑿邗溝之
湫豈秦穿渭水之涇鼙鼓齊興簡數千人之謫卒旌旄
遙指規三百里之滇池則見波浸瀾騰舳艫迤邐船下
水以爭奇士教戰其可恃龍驤之將飛來魚麗之陣特
起氣挾鯨鼉聲號犀兕一軍鵝鷺奮乘風破浪之雄萬
竈貔貅逞擊楫渡江之技不獨射蛟講武飛羽箭於樅
陽居然畫鷁衝流泛樓船於汾水帝乃出未央臨甲觀

七萃風馳六飛雲煥朔皋侍而臣盡鳧趨衛霍從而隊
皆魚貫大蒐於織女磯邊旁睨乎仙人掌畔鼓鞀動地
疑河鼓之喧闐戈艇浮江想天戈之璀璨八校尉射聲
勇奮爭彎弧矢而飛星五將軍下瀨身先宛盪天船而
橫漢所由牂牁約束越巂羈靡威加乎筆牛笮馬貢及
於蜀醬印枝龍城寢戍燕山鏤碑埽盡烽烟映餘灰之
劫火傳來露布紛在眼之旌旗西域能通正博望乘查
之日南人不反是天河洗甲之時勵或謂雄才武騎遠
略兵窮鑒險徒勞晚歲有輪臺之悔開邊未已域中愁

村柚之空迄今過斯池者菰波雲黑蓮露光紅機停夜
月甲冷秋風步荒池而躑躅懷戰蹟於朦朧孰不慨想
平南交之遺略而追思夫西漢之武功

閩志廉撰公祝五十壽文

國家之設翰林院以儲才也射策求賢必賈董方云稱
職宏文啟館若房杜乃號得人使其文不足以擅三長
學不足以輯七略識不足以通變才不足以濟時等鵠
之在梁同雉之竄圉若此者吾無論已亦有洞晰天人
出八子史而草元文於尚白之年官啗落拓納孔軌於
用黃之日世謂迂疎支寶鼎以挂車用太阿使穿履此
之不遇猶可言也豈有陸語霏新歡呼左右孔誦號獨
名震都京而學五技而皆窮官十年而不調然則孝標

辨命之論昌黎復志之賦豈無謂哉我

海屏夫子莆陽世族藝苑詞宗生漁仲之鄉搜羅易富
近芝山之館陶淑尤多擬荷戟以觸羝對楊梅以孔雀
蓋自挽鬢承訓固已巉角稱奇矣旣而縱觀百代杜庫
曹倉揮洒萬言韓潮蘇海田拔萃登進士第得館職爲
纂修官雄辭疊峻最善凌雲大筆含元惟工畫日賞其
文者推爲我輩讀其賦者詫曰仙才然而我

夫子自視歆然不自足也以爲黃甲書名仕途發軔青
簡著錄學海餘波士旣通經必當致用豈以詞賦爲君

子以翰墨爲勛臣哉已卯科典試黔中乙酉科復爲順
天鄉試同考官兩執文衡允孚衆論珠遺赤水象罔能
求銅式金門方臬善相某等之所以不棄於時者猶賴
夫子宏獎之力也時

夫子方充 國史館纂修功臣館總纂本衙門撰文蘭
臺仙吏天祿閣得校秘書松雪前身集賢院兼修國史
高文典冊體大思精乙酉京察一等丙戌復帶記名以
道府用昔王智深撰宋紀告成於豫章王王曰須卿書
成當相論以祿詎非以玉堂直宿精極生寒金管含毫

枯猶待潤哉胡爲乎脈望三餐依然作蠹臬盧十擲輒
復成鍵叙勞別事等鏤冰進職則虛同畫餅翟公門巷
冷欲張羅阮子屏當累惟蠟屐人謂力田不如逢年善
仕不如遇合其

夫子之謂矣然而

夫子不爲芥蒂也豈不以河從積石九曲方通山有豫
章七年乃識鵬翼待扶搖而後舉龍泉經盤錯而始銑
壯志未磨晚成何礙況平十年攻苦夙無宦情七尺昂
藏偏多傲骨堂名醉白羨清興於樂天散滌漆青間養

生於叔夜方將尋大隱於市朝等窮通於寒暑豈以鼎
無列雉車少鳴騶謂足汨我靈臺塵予智府云乎哉今
者籌添鶴算方昔人服政之年曲奏鳳來正摩錫嘉名
之曰孔稚圭詩文跌宕遺世情李元忠藥果流連不
關家事況乎林下同風盤中偶句課兒孫以畫荻喜家
子之捋芹宵讀分燈花開四照晨趨獻綵樹過三株室
家之和氣與融杖履之春風自在某等緣深翰墨幸黜
朱衣契結詩書時依絳帳征輶南使未遑立雪程門奎
斗北瞻猶憶焚香唐幕春來嶺外驛使遙通瑞紀紛生

兕觥共舉詞修楮蕚預效華封三祝之文月上梅梢且
飲張翰一杯之酒

趙以燭撰公視六十壽文

士大夫耽心林壑馳騁騷壇每託嘯歌以見志曰吾之所樂者在也乃不踰時而前後異趣而從之遊者又漫爲俯仰景物之言以相附和而名實間卒不相符何者中無所主故其樂不永窺於外無以及於內故其知不真今之務標榜稱揚者往往然矣吾師

海屏先生昔之名士卽今之名吏也某依之久故知之真先生籍莆田爲閩省名士幼年食餼屢試高等爲吳晴舫李小湖二文宗所賞識辛酉拔萃游京都應京兆

試領鄉薦出賈文端公門下文端深加褒獎名譽遂重
公卿癸亥乙丑兩試南宮薦未獲售乃考充咸安宮漢
教習期滿將以吏出宰名區矣旋以甲戌成進士八翰
林丙子散館一等授職編修益肆力經世之學出入經
史汎濫百家廣見聞觀古今探性理驗才猷以期其學
之有用更以扶植後進留意人才爲汲汲已卯典試吾
黔悉心去取一秉大公所錄同年諸君皆稱俊傑而某
與弟以炳亦得葑菲下體備採藥籠某之得侍先生道
範於此始矣乙酉校京兆得鍾廣閩志廉二太史餘多

知名士其公於掄才者如此先生歷充國史館功臣館纂修官本衙門撰文一皆據事直書務成實錄洎乎昭忠祠列傳臣工列傳告成議叙京察列一等者三次召見時蒙今

上嘉獎方期大用乃未及外放以禮去官至服闋入京二十一年恭逢

萬壽奉派撰寫

慈寧宮楹聯百餘對工切典雅同

僚莫不推許其不苟於任事者如此公餘之暇兼嗜詩古文辭著有國史列傳鈔二十卷荔隱山房詩文集十

卷莆陽文輯五卷莆陽詩輯四卷江行日記四卷雜記
二卷先生性狷介閉戶著述惟樂與二三知己數晨夕
道生平商訂文章雖有濟世之懷未嘗干進近世詞林
諸君子皆以咳唾珠玉組織詞章工書畫善風儀於當
世事恒碌碌無所短長先生留心時務當海疆多故嘗
應 詔上書論事剴切多中利病先生未嘗以告人人
亦莫之知也甲午秋以太守改官至浙是歲遼東邊警
又急到省未兩月卽奉檄委赴杭嘉湖三府閱操水師
先生謝絕供帳埽除積習專以認真督練爲務戰事旣

息重於長官復委權錢江稅務厯別弊端商賈稱便局
滿一年增解比額萬餘金同僚皆服其廉能是役也釐
務公靡曰江干江干者錢塘江之涯浹也風日清麗花
鳥怡人畫舸輕舟游泳無際先生宦興淡泊窮通得失
不以介懷而獨於亭園花木之樂不吝取求乃天卽縱
其欲以酬之此固白樂天蘇子瞻諸騷人所不能專其
勝於前也春夏時和游人如畫想先生葛巾薄袷登靈
隱塔上飛來峯吟咏詩歌嘯傲風月放懷於六橋三竺
間又誰知廬陵之爲太守也於斯之時曾不圖宇宙間

之有斯樂又何數東山絲竹太華蟹酒耶方今時勢艱
難世變未已惟世需才才亦需時此正賢豪見用之秋
也某京華偃仰冠帶委蛇半楮蠲廬琴書聊寄曾不能
獻一策進一計以濟時艱徒規規借文字作生涯護毛
雖若性命每一憶竒山勝水古蹟名洲以及春韭秋菘
故鄉風景輒悵悵不樂者竟曰此又何爲者也欲得從
先生杖履分一日之樂其可得歟或曰先生壯歲爲名
翰林及其出仕又甚名邦其樂也固宜不知先生五困
春闈三躋京察而人與之處者輒淡興之忘必非中無

所得可知也昔者某禮闈報罷瞻拜言別曾憶先生言
曰吾之困亦屢矣然爲文也屏心息慮期與神會意欲
其精思欲其密心之所及筆沛若生故其成也豁然以
釋暢然以怡不知有得何論失哉先生於區區帖括尚
如是則其學養於平日可知也今違先生亦有年矣有
友人自杭來者輒問先生起居丰裁如昔其世兄曰開
榮曰開棠曰開桀均先後入泮食餼世其家學望風逃
聽手爲之舞足爲之蹈遙頌先生之樂正未艾也今爲
先生六十攬揆之辰同門將有以祝屬序於余並命之

曰與其華孰若實與其飾孰若真以予所知紀先生所
行可耳某不敏敢云述先生哉姑就平日所知者爲同
門備告之且以爲當躬法焉至一切駢四儷六之文岡
陵頌禱之詞其無關紀實者茲不綴於篇

江春霖撰祝七十壽序

古之君子進列於朝則宏濟艱難建不朽之功業退而在野則教育賢才講學著書藏名山而傳無窮其所處之地不同其壽於世一也山長

海屏夫子受父師訓早負文名年未及壯卽以拔萃捷京兆充內廷教習洎供奉翰林已近強仕性狷介不苟附權勢在詞館十餘年僅一典黔試及襄校北闈他優差無所與任撰文厯

國史功臣兩館協修纂修總纂撰著盈篋笥以叙勞列

京察一等者三一記名而未放二引見而未記名計資俸遷有日矣翰詹大考又爲夤緣進取者所擠未與前列晚以知府乞外用居浙五載監江干釐局二年餘未涖一小郡乃奮然曰玉堂不住況黃堂乎賦詩見志遂解組歸華園別墅不復出勝所居曰荔隱前後主講郡邑兩書院後進多所造就梓詩文集自著外鄉先生之著作尤搜討不遺餘力年過古稀鍵戶坐一室懷鉛握槧若諸生雖未知詣力所至視古作者爲何如要其講學著書足與吾莆之壺山蘭水並傳於無窮則固非阿

其所好也嗚乎以吾

夫子之資望在翰林若稍肯俯仰從時可累得學試差以馴致卿相而不必外用卽外用肯自貶損以迎合上峰意旨則躋至開府次卽旬宣陳臬亦皆非難事世方尙通而持以介平生抱負閼不得施其不能宏濟艱難以建不朽之業也固無如時命何矣然回憶同時通顯者流或且冒進不已身敗名裂否亦竊位苟祿無所短長卽極貴壽去長樂老有幾焉而

夫子位不遇時挂冠竟去著述自娛垂老不倦昌黎文

公論子厚文學詞章必傳於後雖一時之卿相無以易竊亦用是爲

夫子慰也曩歲

夫子七十生辰門下士躋堂介壽謙不肯受避地於榕城今其長君少海貳尹將補行慶祝不遠六千里而屬

春霖爲之文春霖學術謫陋何足以壽

夫子顧念先君與

夫子同受知於晴舫吳公尊爲父執

夫子主興安講席春霖又嘗執經問難稱弟子誼不容

辭敢舉可以壽世者爲祝他時年壽益高著述益富且將與

國初諸大老之集並採入

四庫而不第流傳於鄉邑其壽更未有艾也

春霖少

夫子一十八歲天假之年尙克預校讐之役願以此爲後約若夫富貴壽考世俗頌禱之詞田舍翁登大年享庸福者世固不乏未足爲

夫子道也請略之